



Convocatoria do plan propio da Universidade da Coruña para o préstamo de ordenadores portátiles ao seu estudiantado no curso 2024/25

A Vicerreitoría de Estudantes e Empregabilidade considera necesario publicar esta convocatoria de préstamo de ordenadores portátiles destinada ao alumnado matriculado na Universidade da Coruña (UDC) no curso 2024/25 en titulacións oficiais de grao e mestrado que se atope en situación de dificultade e non estea a dispoñer dun ordenador que lle permita o normal seguimento das súas actividades académicas ao longo do curso.

BASES

PRIMEIRA. Obxecto

O obxecto desta convocatoria é establecer o procedemento para levar a cabo, en réxime de concorrencia competitiva, o préstamo dun ordenador portátil a aquel alumnado da UDC que o necesite para continuar coa súa formación universitaria. Para iso, poñerase ao seu dispor 20 ordenadores portátiles coas seguintes características: HP 255 G9 6S6F6EA Ryzen 5 5625Ou/ 8GB/ 512GB SSD/ 15.6", co software Microsoft Windows 11 Home 64B DVD (KW9-00656).

SEGUNDA. Requisitos

Poderán ser persoas beneficiarias as que cumpran os seguintes requisitos:

- a) Estar matriculadas nunha titulación oficial de grao ou mestrado, nun centro propio da UDC, durante o curso académico 2024/25, e estar ao corrente do pagamento dos prezos públicos correspondentes. Requírese manter a matrícula todo o curso.
- b) Non dispoñer de ordenador portátil nin dos medios necesarios para a súa adquisición.
- c) Aceptar as condicións do préstamo e da correspondente devolución do ordenador portátil segundo as bases establecidas nesta convocatoria.

Ademais de satisfacer os requisitos anteriores, deben xustificar que se atopan nalgunha seguintes situacións:

- a) Ser solicitantes de bolsa y cumprir os requisitos económicos establecidos na convocatoria de bolsas de carácter xeral do Ministerio de Educación e Formación Profesional para o curso 2024/25.
- b) Ser beneficiarias da Axuda da UDC para o estudiantado en situación de dificultades económicas no curso 2023/24.
- c) Ser beneficiarias da prestación do ingreso mínimo vital.

Non poderá participar o alumnado que estea a cursar un programa de mobilidade nacional ou internacional durante o curso 2024/25.

Este préstamo é incompatible coa percepción de calquera axuda de carácter público ou privado para a mesma finalidade.



TERCEIRA. Duración

A duración do préstamo do ordenador portátil será ata que cesen as causas polas que se solicitou ou, en todo caso, ata o 18/07/2025.

CUARTA. Propiedade dos ordenadores prestados e finalidade do seu uso

Os 20 ordenadores portátiles susceptibles de préstamo son propiedade da Universidade da Coruña e serán empregados exclusivamente con fins académicos. Calquera outro uso poderá dar lugar a responsabilidades económicas e disciplinarias.

QUINTA. Solicitudes

O préstamo realizarase logo da solicitude do alumnado interesado, dirixida á Vicerreitoría de Estudiantes e Empregabilidade.

A solicitude farase a través do documento que figura como anexo I desta convocatoria, que deberá enviarse debidamente cuberto e asinado ao correo electrónico sape@udc.gal.

Xunto coa solicitude achegarase a seguinte documentación:

- Xustificante de pagamento do prezo público de matrícula do curso 2024/25.
- Notificación da Secretaría de Estado de Educación relativa ao cumprimento dos requisitos económicos da bolsa de carácter xeral do Ministerio de Educación e Formación Profesional para o curso 2024/25.
- Xustificante da percepción da Axuda da UDC para o estudantado en situación de dificultades económicas do curso 2023/24.
- Resolución do Instituto Nacional da Seguridade Social prevista no artigo 28.3 da Lei 19/2001, do 20 de decembro, pola que se establece o ingreso mínimo vital.

SEXTA. Prazo de presentación das solicitudes

O prazo de presentación de solicitudes será de 10 días hábiles, contados a partir do día seguinte á publicación da convocatoria.

SÉTIMA. Adxudicación

O préstamo dos ordenadores adxudicarase de acordo coa seguinte orde:

1. Solicitantes que non teñan ningunha titulación universitaria.
2. Alumnado que fose beneficiario da Axuda da UDC para o estudantado en situación de dificultades económicas ou que perciba o ingreso mínimo vital.
3. Solicitantes de bolsa e que cumpran os requisitos económicos establecidos na convocatoria de bolsas de carácter xeral do Ministerio de Educación e Formación Profesional para o curso 2024/25.
4. En caso de igualdade de condicións terase en conta a rigorosa orde de presentación de solicitudes no correo electrónico sape@udc.gal.



OITAVA. Resolución

O órgano competente para resolver o procedemento será a Vicerreitoría de Estudantes e Empregabilidade, que tamén estará facultada para resolver calquera dúbida relacionada coa convocatoria.

A resolución desta convocatoria seralle notificada a cada persoa solicitante a través da conta de correo institucional da UDC.

A Vicerreitoría de Estudantes e Empregabilidade publicará no Taboleiro Electrónico Oficial (TEO) da UDC a relación provisional das solicitudes concedidas e denegadas, neste segundo caso xunto coa causa da denegación. As persoas interesadas poderán formular as súas alegacións en contra no prazo de cinco días hábiles.

Unha vez transcorrido este prazo e analizadas as alegacións que se presenten, a Vicerreitoría de Estudantes e Empregabilidade publicará no TEO a resolución definitiva das solicitudes concedidas e das denegadas, xunto coa causa da denegación, e a listaxe de agarda.

Contra a dita resolución poderá interpoñerse, con carácter potestativo, recurso de reposición ante a Reitoría da UDC no prazo dun mes, conforme o disposto nos artigos 123 e 124 da Lei 39/2015, do 1 de outubro, do procedemento administrativo común das administracións públicas; ou ben directamente recurso contencioso-administrativo ante os xulgados do contencioso-administrativo no prazo de dous meses, segundo o disposto nos artigos 8.3 e 46.1 da Lei 29/1998, do 13 de xullo, reguladora da xurisdición contencioso-administrativa. Os prazos contarán desde o día seguinte ao de publicarse a resolución.

NOVENA. Entrega e devolución do material

O préstamo dos ordenadores portátiles é persoal e intransferible. A entrega realizarase deste xeito:

- a) O alumnado matriculado nunha titulación que se imparta no campus da Coruña recolleraos no Servizo de Estudantes (Pavillón de Estudantes, campus de Elviña).
- b) O alumnado matriculado nunha titulación que se imparta no campus de Ferrol recolleraos no Negociado de Asuntos Xerais (Edificio de Usos Administrativos, primeiro andar, campus de Esteiro).

As persoas beneficiarias deberán proceder a retirar o ordenador portátil adxudicado nos 10 días hábiles seguintes ao da publicación da listaxe definitiva de solicitudes concedidas. Transcorrido o dito prazo, procederase á entrega do ordenador portátil á seguinte solicitante de acordo coa orde da listaxe de agarda.

As persoas beneficiarias procederán á devolución do ordenador portátil cando cesen as causas polas que se solicitou e, en todo caso, como moi tarde o 18/07/2025, tal e como se recolle na base terceira desta convocatoria. Farana de forma presencial no mesmo lugar en que se lles entregou.

Unha vez devoltos, os ordenadores portátiles serán formatados, polo que a persoa beneficiaria será a responsable de extraer do que use aquela información que queira conservar. A UDC non se fai responsable da posible perda de información.

No caso de que non se devolva o ordenador portátil, a UDC emprenderá as accións que permitan recuperalo ou obter a correspondente indemnización polos gastos xerados.



DÉCIMA. Condicións do préstamo

O alumnado beneficiario acepta as condicións de préstamo fixadas nesta convocatoria e será responsable da custodia e o uso correcto do ordenador portátil, que deberá destinar a actividades académicas universitarias, mediante os recursos TIC que a UDC pon á súa disposición.

A persoa beneficiaria comprométese a non manipular o hardware instalado.

No caso de extravío, deterioración ou perda do ordenador portátil cedido en préstamo, a persoa beneficiaria será responsable da súa reposición.

Calquera anomalía ou mal funcionamento durante o préstamo debe ser comunicado inmediatamente ao correo electrónico sape@udc.gal ou a través da páxina web Axuda TIC, axudatic.udc.gal.

UNDÉCIMA. Protección de Datos

En cumprimento do artigo 13 do Regulamento (UE) 2016/679, do Parlamento Europeo e do Consello, do 27 de abril, relativo á protección das persoas físicas no que respecta ao tratamento de datos persoais e á libre circulación destes datos (Regulamento xeral de protección de datos ou RXPd), e do artigo 11 da Lei orgánica 3/2018, do 5 de decembro, de protección de datos persoais e garantía dos dereitos dixitais (LOPD), informamos de que os datos que a persoa interesada facilite mediante a concorrencia a esta convocatoria serán tratados baixo a responsabilidade da Universidade da Coruña (UDC), cuxos datos de contacto son: rúa da Mestranza 9, 15001 A Coruña, teléfono 981 167 000, correo electrónico secretaria.xeral@udc.gal.

A solicitude do préstamo do ordenador portátil implica a aceptación do contido da convocatoria e a autorización para que os seus datos persoais sexan utilizados pola UDC, de acordo coa LOPD e con lexitimidade nalgunha das bases previstas no artigo 6 do RXPd, coa finalidade da correcta xestión das axudas. Todas as persoas que entren en contacto con estes datos coa citada finalidade cumpriran o deber de confidencialidade establecido no artigo 5 da LOPD.

Mediante a concorrencia a esta convocatoria, a persoa interesada consente expresamente a publicación dos seus datos na resolución da solicitude, no Taboleiro Oficial Electrónico (TEO) da Sede Electrónica da UDC, na forma prevista na disposición adicional 7.^a da LOPD. A resolución desta convocatoria permanecerá publicada no devandito taboleiro. Os datos persoais serán conservados mentres resulten necesarios para as finalidades do tratamento e, en todo caso, durante os prazos establecidos pola lexislación vixente, sen prexuízo do previsto en relación co exercicio do dereito de supresión e outros dereitos recollidos na LOPD.

A persoa interesada consente o tratamento dos datos para os efectos de cumprir coa finalidade descrita nesta convocatoria. Terá dereito a retirar o seu consentimento en calquera momento, sen efectos retroactivos. Tamén terá dereito a solicitarlle á responsable do tratamento, en calquera momento, o acceso, a rectificación ou a supresión dos seus datos persoais e a limitación do seu tratamento. De igual maneira, terá dereito a opoñerse ao citado tratamento, así como a solicitar, salvo casos de interese público e/ou exercicio de poder público, a portabilidade dos seus datos.



Estes dereitos poderá exercelos dos seguintes xeitos:

- a) Prioritariamente, a través do formulario para o exercicio dos dereitos en materia de protección de datos persoais que se pode cubrir na Sede Electrónica da UDC, <https://sede.udc.gal/>, no apartado Outros trámites.
- b) Mediante solicitude á responsable do tratamento dos datos (UDC, Secretaría Xeral), dirixida ao enderezo: Secretaría Xeral, Reitoría da Universidade da Coruña, rúa da Mestranza 9, 15001 A Coruña; ou ao correo electrónico rpd@udc.gal. Tamén poderá presentarse a solicitude a través do rexistro telemático da Sede Electrónica da UDC ou nos rexistros presenciais desta universidade.
- c) Mediante solicitude á persoa delegada de Protección de Datos, dirixida ao mesmo enderezo postal anteriormente indicado ou ao correo electrónico dpd@udc.gal. Tamén se poderá presentar a solicitude a través do rexistro telemático da Sede Electrónica da UDC ou nos rexistros presenciais desta universidade.

Así mesmo, ten dereito a presentar unha reclamación ante a Axencia Española de Protección de Datos (AEPD).

Asinado na Coruña, na data da firma dixital.

O reitor,
P.D. Vicerreitora de Estudantes e Empregabilidade
RR. 10 de xullo de 2024
María José Lombardía Cortiña



ANEXO I

SOLICITUDE DE PRÉSTAMO DE ORDENADOR PORTÁTIL CURSO 2024/25		
DATOS PERSOAIS		
DNI:	APELIDOS:	NOME:
XÉNERO: <input type="checkbox"/> Masculino <input type="checkbox"/> Feminino <input type="checkbox"/> Non binario <input type="checkbox"/> Outro		
GRAO/MÁSTER QUE SE ESTÁ A CURSAR		
ENDEREZO PARA OS EFECTOS DE NOTIFICACIÓN		
CORREO ELECTRÓNICO:		TELEFONO MÓBIL:
RÚA:	N.º:	ANDAR:
CONCELLO:	CÓDIGO POSTAL:	PROVINCIA:

Expón:

- Que non dispoño de ordenador portátil nin de medios para a súa adquisición.
- Que non percibo ningunha axuda de carácter público ou privado para a mesma finalidade.
- Que son solicitante da bolsa carácter xeral do Ministerio de Educación e Formación Profesional para o curso actual e cumpro os requisitos económicos establecidos na convocatoria.
- Que percibín a Axuda da UDC para o estudantado en situación de dificultades económicas no curso 2023/24.
- Que percibo a prestación do ingreso mínimo vital.
- Que non estou en posesión de ningunha titulación universitaria.
- Que acepto as condicións do préstamo, así como as de devolución do ordenador portátil cando cesen as causas polas que se solicitou e, en todo caso, como moi tarde o 18/07/2025, segundo as bases establecidas na convocatoria.
- Que coñezo e acepto os termos da protección de datos (undécima base da convocatoria).

Sinatura do/a alumno/a	
-------------------------------	--

Datos do ordenador portátil prestado		Servizo de Estudiantes da Coruña Negociado de Asuntos Xerais de Ferrol
N.º de serie:	N.º de inventario	Data/selo:
Recibín o ordenador portátil:	Data/sinatura:	

DEVOLUCIÓN DO ORDENADOR PORTÁTIL	
Alumno/a	Servizo de Estudiantes da Coruña Negociado de Asuntos Xerais de Ferrol
Sinatura:	DATA/SELO: